

Dumonda Favre Accola concernent l'amplificaziun da la lingia dal Partenz da la Viafier retica

Il tract Landquart – Claustra da la Viafier retica è il tract-tschep per trais destinaziuns:

- Landquart – Claustra – Tavau (-Filisur)
- Landquart – Claustra – Scuol
- Landquart – Claustra – San Murezzan

Tranter Landquart e Schiers curseschon anc mintga ura trens da la viafier S.

Il grad da construcziun da questa lingia frequentada fermamain na correspunda gia daditg betg pli a las pretensiuns per ina purschida d'urari svelta, concentrada ed uschia attractiva en il Partenz. Pervia dals lungs tracts cun in binari datti sin questa lingia ultra da quai fitg blers retards.

En il studi «Zu(g)kunft Graubünden» ch'è vegnì fatg l'onn 2001 per incumbensa da l'antier Post spezialisà per il traffic public e da l'Uffizi per il svilup dal territori èn vegnidas enumeradas en il chapitel «6. Mesiras per accelerar e per augmentar la prestaziun da la rait da la Viafier retica» las suandantas propostas per la lingia dal Partenz:

«La finamira sto esser in tract cun dus binaris tranter Landquart e Claustra. Sco finamiras d'etappa duain vegnir accelerads ils suandants projects da construcziun:

- 1. lingia cun dus binaris senza interrupziun da la staziun da Landquart sur Malans – Chlus (fin avant il tunnel), emprima prioritad ha il tract Malans Viafier retica fin al tunnel Chlus;*
 - 2. construcziun d'in nov trassé a Grösch (per lung da la via da sviament da Grösch) per il traffic da trens rapids senza fermadas a Grösch;*
 - 3. construcziun d'in nov trassé per ils tracts Fideris – Küblis e Küblis – Claustra;*
 - 4. amplificaziun da la staziun da Schiers (perruns accessibels senza traversar ils binaris), lingia cun dus binaris en direcziun da Grösch fin a la punt da la Viafier retica sur la via da sviament dal Partenz.*
- Cun questas propostas da construcziun po d'ina vart vegnir augmentada la prestaziun e po da l'autra vart vegnir reduci fermamain il temp da viadi.»*

Dapi lura èn in pèr chaussas vegnidas realisadas resp. èn en planisaziun (concept dal territori Partenz / Tavau 2020), bler però anc betg.

La lingia dal Partenz da la Viafier retica vegn a vegnir duvrada supplementarmain anc pli fitg en vista a la **lingia da colliaziun da viafier en discussiun Scuol (– Val Müstair) – Mals**. Oravant tut è necessaria ina clera acceleraziun per trens rapids.

La Regenza vegn dumandada:

1. Tge tenuta ha la Regenza envers la pretensiun d'amplifitgar il tract Landquart – Küblis cumpletamain a dus binaris? Cun tge custs fissi da far quint?
2. Quant lunsch èn progredids ils projects d'in sviament da Grösch per trens rapids per lung da la via da sviament? Tge documents e tge calculaziuns dals custs existan concretamain?
3. È la Regenza er da l'avis che la lingia existenta sto vegnir mantegnida, er sch'ina nova lingia vegn construida a Grösch, e quai per ch'il center dal vitg da Grösch restia accessibel uschè bain sco pussaivel (incl. ina fermada supplementara a Grösch ost per trens locals)?
4. Quant lunsch è progredì il project per la construcziun dal tract nov Fideris – Davos che vegn planisà sco project cumbinà cun la via naziunala A 28?
5. È la Regenza er da l'avis che tut ils tracts novs ston vegnir construids da bel principi cun dus binaris? Quant gronda è la differenza dal custs per ina lingia cun dus binaris envers ina lingia cun in binari, che sto posteriuramain tuttina vegnir engrondida ad ina lingia cun dus binaris? Quant temp po vegnir spargnà sin la lingia Landquart – Tavau grazia a questas mesiras d'amplificaziun?
6. Resguarda la Regenza il project da generaziun da spustar la staziun da Tavau Vitg er sco ina mesura d'infrastructura impurtanta per cuntanscher in meglierament signifitgant da la purschida da l'axa dal Partenz?

Tavau, ils 18 da favrer 2021

Favre Accola, Bettinaglio, Gort, Atanes, Bigliel, Brandenburger, Cahenzli, Caviezel (Cuira), Censi, Degiacomi, Della Cà, Derungs, Dürler, Engler, Felix, Flütsch, Gartmann-Albin, Hardegger, Hartmann-Conrad, Hefti, Holzinger-Loretz, Horrer, Hug,

Jenny, Kienz, Koch, Lamprecht, Müller (Favugn), Müller (Susch), Niggli (Samedan), Niggli-Mathis (Grüsch), Perl, Preisig, Rettich, Rutishauser, Salis, Schwärzel, von Ballmoos, Weber, Widmer (Favugn), Wilhelm, Pajic, Renkel, Spadarotto